

Jahresbericht Präsidium amathea.ch 2025/26

Aus Saatkörnern der Gegenwart wachsen Lieder für morgen

unbekannte Autorenschaft

Grad jetz, wenn i uf em Baukon hocke oder düre Garte streife, stuune i immer wieder, wie i aune Ritze, a Escht u ufem Bode Läbe erwacht. Zarti Blettli spriesse u Blüete lüchte um d Wett. Ersch isch doch no grad viu Schnee druf gläge u het dene fiine Pflänzli fasch dr Schnuuf gno. Mit auer Chraft strecke sie sech jetz wieder de wärmende Sunnestrahle entgäge u enfröie üses Härz.

Für mi e guete Vergleich mitere Theaterproduktion. Wie seit me doch so schön «Nach der Theatersaison ist vor der Theatersaison». D Sämlü für ne nächschi Produktion wärde meischtens scho gsäit, während di aktuelle Vorstellige loufe. Isch de d Dernière düre, gspüre vili vo üs e Lääri u andersits o es Ufschnuufe ume chli meh freii Zyt. Chuum schwirre auerdings di erschte Ideene i üsem Chopf ume, erwachtet ds Theaterbluet zum Läbe, wärmend, inspirierend u schön!

Hie e Überblick über ds letschte Vereinsjahr:

Im Mai si mir z Plaffeie überwütiget gsi vo dr Gaschtfründschaft, wo üs dr Theaterverein entgägebracht het. Dr offiziell Teil vor HV isch schnäu düre gsi u mir hei bimene Dorfrundgang spannendi Gschichte zum Ort erfahre. Während em feine Ässe hei mir immer wieder e Verdouigsrundi miteme Akt Theater gha. Me seit ja, spaziere hiuft verdoue, doch mir hei eifach d Buch- u Gsichtsmuskle mit Lache trainiert. Merci öich viu Mau für dä glungnig Tag!

Für d Jahresversammlig vom ZSV im Juni hani zwöi Mau (Klousur e Monet vorhär) chönne i ne Gägend reise, woni no gar nid guet kenne u em Lukas, üsem Zentralpräsident, sini Heimat isch. E Bsuech z Schaffhuse u Umgäbig lohnt sech nid nume wäg em Wy.

Scho zum 5. Mal hani ir Stückwahlkommission u de im Juni als Gascht bim Volkstheaterfestival Meiringe dörfe derbi si. 5 Tag mi viune luschtige u spannende Begänige u unterschiedleche Theatervorstellige. E Gnuss!

Leider hani a Allerheilige a üsem Mitglieralass wäge Theatervorstellig nid chönne derbi si u di Kläng ir Chiuche Burgdorf u ds feine Ässe verpasst. D Schilderige vo begeschterete Teilnehmende hei üs sehr gfröit.

Im Novämber het üsi zwöiti Klousur under em Motto «Witerentwicklig / nöii Verbandsstrukture» aber o «Gselligkeit» stattgfunde. Dert hani z schöne Stedtli Stans u ihres beidruckende Theaterlokal bire Füehrig chönne kennelere u mau wieder d Glägeheit gha, mit de Vorstandskolleg:inne vom ZSV live z brichte u nid nume übere Bildschirm, wie bi üsne GA und ZV Sitzige.

Am 28. März bini nomau z Plaffeie alässlech ihrer Jubiläums GV (50 Jahr) mit offene Arme empfangen worde. Guet hani d Winterpneu no druffe gha.
Härzlechi Gratulation o a dere Stell u danke für dä gmüetlech Abe!

Im Vorstand amathea.ch hei mir Sitzige abghaute u meischtens lang diskutiert, das heit dir ja ir Theaterzytig chönne läse. Trotdäm isch d Gmüetlechkeit u d Kulinarik nid z churz cho, bsunders am scho legendäre Wiehnachtsässe bim Chlöisu dehei. Är fragt zwar aube nach Unverträglechkeite und Vorliebe u trotdäm hets i sim Galamenu scho Anis gha.

Bsunders schön si für mi d Bsüech bi öich! I gniesses immer wieder u möcht öich a dere Stell einisch meh für öies grosse Engagement u öii Verbundeheit danke!

amathea.ch het drei Kurse planet gha. Leider hei zwe mangels Amäudige müesse abseit wärde. Dr Kurs, «Schauspielende anleiten» mit dr Käthi Vögeli isch ame Wuchenänd z Burgdorf mit 11 Teilnehmende düregführt worde.
Auso mäudet öich für z 2026 a, es git viu gluschtegi Agebot.

O i däm Vereinsjahr hei üs liebi Theatermönsche müesse verla. Im Dezämber hei mir vom Peter Siegenthaler, mim Vorgänger, begnadete Schouspieler, Rhetoriker u engagierte Mönsche- u Tierfründ Abschied gno. Peter, mir vermisse di!

Zum Schluss möcht i mine Vorstandskolleg:inne u aune wo üs immer wieder bi üsere Tätigkeit unterstütze, härzlech danke! Schön gits öich u darf i Zyt mit öich verbringe.

U jetz wott i nüm länger wärde. Uf i Garte zum Säie! I fröie mi scho uf au di farbige, viufäutige u spannende Lieder ... i meine Theaterproduktione.

Im Mai 2026

Härzlech

Pia Abplanalp
Präsidentin amathea.ch